

He taihara tino nui te koeretanga. Ka ngaukino ngā pānga, ā, mō te wā roa hoki. He rerekē te urupare a te katoa, ā, me te hiahia hoki ki ngā momo tautoko rerekē.

Ahakoia pūrongo koe i tētahi taihara, kāore rānei, ka taea e koe te tiki tautoko. He pokapū kei tō rohe e whakarato tautoko kare ā-roto me te whaitake, he mea ngaio. Waea atu ki te Victims Information Line ki 0800 650 654 ki te rapu mōhio mō ngā tari tūtata ki a koe. E whakamārama ana tēnei pukameka i ngā mahi ka puta mēnā ka pūrongohia e koe he taihara me ngā tautoko ka whiwhi koe.

*Tirohia te pito o tēnei pukameka mō ngā whakapā matua me tētahi rārangi kupu.*

## Ngā motika a te hunga pāturenga

E whai tika ana koe kia whakamōhiohia koe mō ngā ratonga āwhina i a koe, kia whakamōhiohia haerehia koe mō te kēhi i roto i te kōti me te mōhio anō ki ngā mea ka pā mai ina haere koe ki te kōti.

E whai tika ana koe ki te kōrero atu ki te kōti mō te pānga mai o te taihara ki a koe. Mēnā ko koe te pāturenga o tētahi taihara nā te taiohi, e whai tika ana koe ki te haere ki tētahi hui rōpū ā-whānau me te tuku kōrero anō mō ngā mea e hiahia ana koe kia puta.

I ētahi kēhi, e whai tika ana koe, tō māngai rānei ki te kōrero mō ngā mea pēnei i te pēhanga ingoa, te utu here, whakarautanga kāinga, te tukuhere rānei.

Ko te tikanga ka hūmārika, ka aroha, ka whakaute hoki ngā āpiha kōti, ngā pirihihana me ētahi atu i roto i te kēhi ki a koe. E whai tika ana koe ki te tūmataiti.

Pānuihia te Victims Code mō ētahi atu kōrero mō ō motika me ngā whakaritenga e tūmanako ana māu. Kei runga tēnei i tā mātau paetukutuku [victimsinfo.govt.nz](http://victimsinfo.govt.nz) me ētahi atu kōrero whaitake.

Mēnā ki ō whakaaro kāore anō kia tutuki ō motika, kāore rānei i pai ngā ratonga ki tāu i tūmanako ai, ka taea e koe te tuku amuamu. Tirohia a [victimsinfo.govt.nz](http://victimsinfo.govt.nz), waea atu rānei ki te Victims Information Line i 0800 650 654.

## Te whakamōhio atu i tētahi taihara

Mēnā he pāturenga koeretanga nō tata nei koe, kei te noho mōrearea rānei koe, waea atu ki 111 ka tono i ngā pirihihana.

Mēnā i pā mai te taihara i tētahi wā roa ki mua, ētahi tau maha hoki, ka taea tonu e koe te whakamōhio atu. Kāore he wā kati mō tō whakamōhio atu i tētahi taihara koeretanga ki ngā pirihihana. Ki te hiahia koe ki te whakamōhio i tētahi taihara i pā mai i mua rā anō, waea atu ki te teihana pirihihana o tō rohe me te tono atu ki te kōrero ki tētahi kairapuhara. Ka taea e koe te heri kaitautoko i tō taha ina whakamōhio atu koe i tētahi taihara.

Ko te mea tuatahi mō ngā pirihihana ko te whakarite kei te noho haumaruru koe. Ina pūrongohia e koe te taihara ka tohua he pirihihana ki a koe, ā, māna e whakahaere tō kēhi. Ka taea e koe te whakapā atu ki a ia i tētahi wā ake ki te rapu mōhio mō te kēhi.

Ka waea atu anō te pirihihana ki tētahi tari urupare mōrearea mātanga, Manaaki Tangata rānei hei kōrero atu ki a koe mō ngā mea ka whai ake. Ka āta whakangungua ngā kaimahi tari urupare mōrearea mātanga ki te tautoko i ngā pāturenga koeretanga ka mutu me te mahi tahi me koe puta noa i te whakatewhatewha me te kēhi kōti.

Ka taea e koe te waea atu ki te Victims Information Line i 0800 650 654 ki te rapu mōhio atu anō mō ngā tari tautoko atu anō i roto i tō rohe.

## Te whakatewhatewhanga

He taumaha te whakatewhatewhanga i tētahi taihara koeretanga, ā, ka ngana ngā pirihihana kia nui te kohikohi i ngā taunakitanga e taea ana mō te kēhi. Ka kōrero atu tētahi kaiuiui pirihihana matatau ki a koe, ā, tērā pea he maha ngā kōrerotanga ki a koe ki te rapu i ngā mea katoa i pā mai. Ka taea te tono kia kōrero koe ki tētahi pirihihana tāne, wahine rānei.

I roto i te whakatewhatewhanga, tērā pea ka tonoa koe ki tētahi whakamātau ā-tinana. Kei a koe te tikanga. Ka kite koe i tētahi tākuta matatau ki te mahi me ngā pāpurenga koeretanga. Ka whakarato taunakitanga hira tēnei mō te kēhi. Ka taea e koe te whai kaitautoko i tō taha i ngā wā katoa.

I te wā o te whakatewhatewhanga, ka uiui pea ngā pirihihana i ētahi atu tāngata e mōhio ana ki ētahi kōrero mō te taihara, tae atu ki te kohikohi taunakitanga pēnei i ngā whakaahua me ngā whakamātautau e pā ana ki te whare whakawā. Mēnā he nui ngā taunakitanga a ngā pirihihana, ka hopukina ā-ture te tangata me te whakapā hē i a ia ki tētahi taihara.

#### UTU HERE

Ina hopukina tētahi, tērā pea ka tukuna ia kia tae rawa ki te wā e tū ai ki te kōti. E kīia tēnei he utu here (bail). I ētahi wā kei reira ngā here mō te wāhi noho o te tangata me te rāhui haere pō. Ki te whakaaro ngā pirihihana ka noho mōrearea koe, ētahi atu rānei i roto i te hapori, ka puritia te tangata ki rō whare herehere kia tae te wā mōna kia haere ki te kōti, ina tonono anō mō te utu here.

Ka taea e koe e te tuku i ō whakaaro mō te tukutanga o te tangata ki te utu here, ā, kia whakamōhiohia koe mō te putanga. Kei a koe te tikanga ki te whakauru atu ki te rēhita whakamōhio pāpurenga kia noho mōhio haere koe mō ngā pānga ki te tangata hara i muri i te whakawhiu. Ka noho matatapu ō kōrero āmiki. Mēnā e hiahia ana koe, ka taea te kōwhiri i tētahi tangata ki te whiwhi i ēnei kōrero mōu.

#### TE TAUĀKĪ PĀNGA PĀPURENGA

Ka pātaihia koe mēnā e hiahia ana koe ki te tuku i tētahi tauākī pānga pāpurenga. Ka whakamārama atu tēnei ki te kōti i te pānga o te taihara ki a koe. Ka taea e te pirihihana whakahaere i tō kēhi, Manaaki Tangata, tētahi atu pokapū rānei te āwhina i a koe ki te tuhi i tēnei tauākītanga. Tirohia he kōrero atu anō mō tō tauākī pānga pāpurenga i raro i *Te whakataunga me te whiu*.

I ētahi wā, ahakoa te kaha ngaio o te whakatewhatewhanga, kāore i te nui ngā taunakitanga hei hopu ā-ture, te heri rānei i te kēhi ki te kōti. Ehara i te mea kāore koe i whakaponohia.

## Tautoko

Ka taea e koe te tiki tautoko mō te wā e whakatewhatewhahia ai tō kēhi. Mō te tiki tautoko kare ā-roto, ngā tautoko whaitake mō ngā mea pēnei i te rapu mōhio mō te rīanga, waea atu ki Manaaki Tangata i 0800 842 846, waea atu rānei ki te Victims Information Line i 0800 650 654 ki te whai mōhio mō ētahi atu pokapū tautoko i tō rohe.

#### TE TAIHARA TAIIOHI

Mēnā nā tētahi taiohi i raro i te 17 tau te taihara, ka whakaritea te take mā te hātepe ture taiohi. He mea nui ngā pāpurenga ki roto i te hātepe ture taiohi, ā, e whai tika ana koe ki te haere ki tētahi hui rōpū ā-whānau.

E wātea ana ngā rauemi whānui i Te Tari Āwhina i te Tamaiti, te Rangatahi, tae atu ki te Whānau (CYF) me ngā kōti mō te pūnaha ture taiohi. Ka whakapā atu tētahi kairuruku rōpū ā-whānau mai i CYF ki a koe.

#### TE TAUTOKO Ā-PŪTEA

E wātea ana ngā pūtea hei āwhina i a koe ki te utu i ētahi o ngā utu e pā ana ki te taihara. Mō te tirotiro mēnā ka whiwhi pūtea koe, ā, me pēhea te tonono, whakapā atu ki 0800 842 846.

- Ka taea tētahi pūtea tae ki te \$500 te tonono mō ngā whakapaunga ka puta i te koeretanga, pēnei i te whakatikatika i ngā raka, te hoko kākahu hou, whare noho rangitahi rānei.
- E wātea ana he pūtea o te \$100 i ia rā (\$50 mō te hāwhe rā) ki te pāpurenga koeretanga me tōna hoa tautoko kāore i te utua, hei haere atu ki ngā whakawātanga kōti. Ka wātea hoki tēnei pūtea ki te kaitiaki e haere ana hei māngai mō tētahi tamaiti pāpurenga me tōna hoa tautoko.
- E wātea ana ngā pūtea tautoko mō te haerenga atu, wāhi noho me ngā utu hāngai mā ngā pāpurenga taihara nui (kei roto ko ngā taihara koeretanga katoa) me tōna kaitautoko kāore i te utua e haere ana ki te kōti me ngā whakawātanga Poari Tukuhere.
- Atu ki te \$2000 e wātea ana hei parepare mō ngā ohotata mā te hunga e āhei ana ki tētahi kāri ratonga hapori.

Ka āhei anō pea koe ki ētahi atu āwhina ā-pūtea mai i ACC. Pātai atu ki tō pokapū tautoko ki te rapu mōhio atu anō, waea atu rānei ki te ACC Sensitive Claims Helpline i 0800 735 566.

---

## I te kōti

Ko te tikanga he maha ngā tūnga a te whakapaenga (te tangata whakatuaki taihara) ki te kōti, hei tauira, ki te whakapuaki he hara tōna, kore hara rānei, mō te titiro rānei a te kaiwhakawā i ngā taunakitanga. Ko te tikanga kāore koe e herea ki te haere ki ēnei whakawātanga, engari ka taea e koe te haere mēnā e hiahia ana koe ki te haere.

Ki te whakapuaki te whakapaenga kei te hara ia, ka whakawhiua ia i taua rā tonu, ka whakatauhia rānei he rā mō te whakawātanga whiu. Ki te whakapuaki te whakapaenga kāore ia i hara, ka whakawāhia te kēhi.

I te kōti ka whakatakotohia e te kaiwhiu te kēhi ki te kaiwhakawā me te rōpū whakawā. Ka mahi te kaiwhiu mā te kāwanatanga, ā, kei a ia te kawenga mō te hāmenē kēhi mō te Karauna, ngā pirihimana me te iwi whānui. Ko te tikanga ka karangahia koe kia tū hei kaiwhakaatu mā te Karauna hei āwhina ki te hāpono i te kēhi ki te whakapaenga (tirohia *Te noho hei kaiwhakaatu*).

Ka tūtaki te kaiwhiu ki a koe me te kōrero atu he aha ngā whakapae ka whakatakotohia me te take, ā, he aha ka puta i te kōti.

I roto i ngā kēhi koeretanga, ka aunoa te rāhui i te hunga pāpāho i te whakamōhio atu i tō ingoa, i ngā kōrero rānei e mōhiohia ai koe.

Me kōrero atu ki tō kaitohutohu pāpurenga koeretanga, te pirihimana whakahaere i tō kēhi, tāu ake kaimahi tautoko rānei mēnā e hiahia āwhina rongo, nekeneke, whakamāori reo rānei.

He mea nui tō haumaruru. Mēnā he āwangawanga ōu ahakoa te wā mō tō haumaruru i te kōti, me kōrero atu ki tētahi pirihimana, āpiha whakamaruru rānei.

### KAITOHUTOHU PĀPURENGA KOERETANGA

Ka wātea ki ngā pāpurenga koeretanga ngā kaitohutohu pāpurenga mātanga, kua āta ākona, ā, he mōhio tonu ki te mahi i roto i ngā āhuatanga o te koeretanga.

Ka taea e te kaitohutohu pāpurenga koeretanga te whakamārama i te hātepe kōti ki a koe, te āwhina i a koe kia mōhio ai koe kei te aha me te kōrero atu ki a koe āhea te tangata hara ka tū ki te kōti. Ka taea anō e ia te whakamārama ki hea tiki tautoko whaiaro tōtika mōu.

Waea atu ki te Victims Information Line i 0800 650 654 mō ētahi atu kōrero.

---

## Te noho hei kaiwhakaatu

Te āhua nei ka karangahia koe hei kaiwhakaatu. He āhuatanga ahotea nui pea te noho hei kaiwhakaatu. Ka taea e te kaiwhiu, te pirihimana whakahaere i te kēhi me tō kaitohutohu pāpurenga koeretanga te kī ka aha, ā, he aha ka tūmanakohia.

### I MUA I TE KŌTI

Ka kōrero atu te pirihimana whakahaere i tō kēhi, tō kaitohutohu pāpurenga koeretanga ranei āhea koe haere ai ki te kōti, ā, ki hea hoki. Ka tukuna anō tētahi pānui whaimana ki tō kainga.

Ka kōrero atu te kaiwhiu ki a koe mō te wāhi ki a koe hei kaiwhakaatu. Ka taea e koe te tonu ki te toro tōmua i te ruma kōti. Kōrero atu ki tō kaitohutohu pāpurenga koeretanga, te pirihimana whakahaere, tētahi kaimahi tautoko rānei ki te whakarite i tēnei.

Me kōrero atu ki tō kaitohutohu pāpurenga koeretanga, te pirihimana whakahaere rānei mēnā kei te hiahia koe kia whakaritea:

- he tangata ki te tūtaki i a koe ki te kōti, i waho rānei
- he kaitautoko hei noho i tō taha i a koe ina tuku taunakitanga
- he ārai, he pouaka whakaata ara iahiko kati rānei, kia kore ai koe e titiro atu ki te whakapaenga i a koe e tuku taunakitanga (mēnā e wātea ana).

### I TE KŌTI

Ina tuku taunakitanga koe, ka 'katia' te kōti. Ko te tikanga o tēnei kāore e whakaaehia te iwi whānui ki roto. Ka pātaihia koe ki ētahi pātai mō ngā mea i pā, mō ō mōhio rānei mō te taihara.

I te nuinga o ngā kōti, he wāhi tatari motuhake mō te hunga kaiwhakaatu, engari ko te tikanga ka kite tonu pea koe i te whānau me ngā hoa o te tangata whakatuaki i roto o te kōti, i te takiwā rānei o te kōti.

He mea nui kia whai tautoko koe hei kaiwhakaatu i mua, me taua rā tonu. Me kōrero koe ki tō kaitohutohu pāpurenga koeretanga, kaimahi tautoko rānei mō te tiki tautoko e tika ana mōu.

---

## Te whakataunga me te whiu

I te mutunga o te whakawātanga, ka kitea mēnā i hara, kore hara rānei te whakapaenga. I ētahi kēhi, pērā i ērā kāore te rōpū whakawā e whakaae tahi ana ki tētahi whakataunga, ka tū anō pea tētahi whakawā.

---

Mēnā ka whakatauhia kāore te whakapaenga i te hara, ehara i te mea kāore koe i whakaponohia. He take ture me te taunakitanga te āhua o ngā kēhi. Ina whakatauhia kāore te whakapaenga i te hara, ka wātea ia ki te haere. Ka ohore pea koe ki tēnei me tō hiahia anō ki te kōrero mō tēnei ki tō kaitohutohu kaimahi koeretanga, te kaimahi tautoko rānei.

Mēnā ka whakatauhia kei te hara te tangata, ka whakawhiua pea ia i taua rā tonu, ka whakatauhia rānei he rā mō tētahi whakawātanga whiu.

## TE TURE WHAKAHŌRITE

Ko te hui ture whakahōrite he hui tēnei ka whakahaere kōkautia i waenga i te pāpurenga, te tangata hara, ngā kaitautoko, me ētahi atu tāngata ka whakaaehia, pēnei i ngā māngai hapori, kaiwhakamāori reo rānei.

Mā te hui ture whakahōrite ka āhei ngā pāpurenga ki te kōrero atu ki te tangata hara mō te pānga ki a rātau, te whakaputa kōrero me pēhea te whakarite i te kino, me te tīmata ki te whakarite i ētahi o ngā pānga o te taihara.

Mō te whakaaehia kia whakaritea tō kēhi mō te hui ture whakahōrite me whakatau te tangata hara kei te hara, ka whakapuaki rānei ia i hara ia, ka mutu ka whakaae tahi kōrua ki te whakauru atu.

Ki te hiahia whakamārama anō mō te hui ture whakahōrite me pātai atu ki tō kaitohutohu pāpurenga koeretanga, haere rānei ki [justice.govt.nz/restorative-justice](https://justice.govt.nz/restorative-justice)

## WHAKATAU WHIU

E herea ana te kaiwhakawā i raro i te ture kia whakaaroahia ngā āhuatanga maha, pēnei nā, he aha ngā whakawhiu o mua mō ngā taihara ōrite me ngā pūrongo mō te tangata hara.

Ki te whakaae te kaiwhakawā, ka taea e koe, e tētahi atu rānei i tohua e koe, te pānui i tētahi wāhanga, i te katoa rānei o tō tauākī pānga pāpurenga i roto i te kōti i te whakawātanga whiu. Me pātai atu koe ki tō kaitohutohu pāpurenga koeretanga, te pirihimana whakahaere i tō kēhi rānei ki te pātai atu ki te kaiwhakawā. E herea ana te kaiwhakawā ki te whai whakaaro ki tō tauākī pānga pāpurenga ina whakawhiu ia i te tangata hara.

## PAREMATA

I ētahi wā ka whakahauhia te tangata hara e te kaiwhakawā ki te utu i a koe, e kīia ana tēnei he paremata, mēnā i pākia kinohia koe, i riro atu, i tūkinohia rānei ō rawa i tēnei taihara. Ka taea e koe te waea atu ki te kōti i 0800 909 909 ki te whakarite i te tikanga pai e whiwhi ai koe i tō paremata.

## NGĀ PĪRA

He motika ā te kaiwhiu me te tangata hara ki te pīra i te whakataunga me te whakatau whiu. Ko te tikanga o tēnei ka riro mā tētahi kōti teitei ake e tiro tiro anō te kēhi. Ki te pēnei, ka whakamōhiohia koe e te kaiwhiu mō te hātepe.

## I muri i te kōti

Ina whakatauhia kei te hara, ka whakawhiua te tangata hara. Ehara i te mea he māmā te whai māramatanga ki ngā whiu. Mā te pirihimana whakahaere i tō kēhi, tō kaitohutohu pāpurenga koeretanga rānei e whakamārama atu he aha te tikanga o te whakawhiu.

## TUKUTANGA I TE WHARE HEREHERE

Ka tukuna ngā tāngata hara mai i te whare herehere mā te tukuhere, i te mutunga rānei o tā rātau whakawhiu. Ka tukuna pea i mua o te wā e tūmanakohia ana e koe, engari ka uru mai anō te wā i noho i rō whare herehere i mua i te whakataunga me te whakatau whiu

Ki te mutu te whakawhiu a te tangata hara, me mātua tuku ia mai i te whare herehere. Kāore e āhei ki te pupuri tonu i a ia i rō whare herehere ina mutu tana whakawhiu.

Ka taea te tuku te tangata hara i mua i te mutunga o tana whiu mēnā ka whakaaehia he tukuhere. Ka tirohia e te Poari Tukuhere ngā kēhi o te nuinga o ngā tāngata hara me te whakatau mēnā ka pā he mōreareatanga ki te hapori mēnā ka tukuna tōmuatia te tangata hara.

I te nuinga o te wā me ū ngā tāngata hara ki ngā here whāiti mō te ono marama i te iti rawa mai i te tukunga ki te tukuhere. E whakatauhia ana ngā here e te Poari Tukuhere, e te kaiwhakawā rānei nāna te tangata hara i whakawhiu. Ka kapi pea i ēnei whakaritenga te wāhi me noho ia, ko wai te hunga ka āhei te whakapā atu, mēnā he rāhui haere pō, me ētahi atu āhuatanga tiaki i te hapori.

## KA TAEA E KOE TE KŌRERO ATU KI TE POARI TUKUHERE MŌ Ō WHAKAARO MŌ TE TUKUNGA O TE TANGATA HARA.

Hei whakaputa i ō whakaaro mō te tukunga tōmua o te tangata hara mai i te whare herehere, me rēhita koe ki te rēhita whakamōhio pāpurenga kia pai ai te whakapā atu a te Poari Tukuhere ki a koe ina whakawāhia te tangata hara e te Poari Tukuhere.

Hei mātua whakarite kei te hou ō taipitopito whakapā ki te rēhita, me whakapā atu ki ngā pirihimana, Te Ara Poutama o Aotearoa, tō tari tautoko rānei.

Ka taea e koe te tuku atu i ō whakaaro ki te Poari Tukuhere mā te tuhituhi, te hui ataata, ā-tinana rānei:

- **Ā-tuhi, ā-hui ataata rānei.**

Me kōrero atu ki tō Poari Tukuhere.

---

- **Ā-tinana.**

Ka hui te Poari Tukuhere me koe. Ka kōrero koe ki ērā tangata anō ka kite i te tangata hara, engari ko te hui e haere ana koe kāore i te whare herehere, ā, kāore hoki te tangata hara i reira. Ka taea e koe te heri kaitautoko atu ki te whakawātanga.

---

## Ngā tangata whakapā matua

He tautoko kei reira mōu ahakoa kei tēhea wāhanga koe o te pūnaha ture taihara, ā, ka taea e ngā tautoko whaiaro te āwhina i a koe ki te whakarite i ngā pānga o te taihara.

Anei ngā taipitopito whakapā mō ētahi tino ratonga mā ngā pāpurenga me ngā tangata e pākia e te taihara. Ka kitea e koe he kōrero atu anō mō ngā ratonga mā te waea atu ki te Victims Information Line i 0800 650 654 (9am ki 6pm mai i te Mane ki te Paraire), haere rānei ki [victimsinfo.govt.nz](http://victimsinfo.govt.nz)

### ACC

[acc.co.nz](http://acc.co.nz)

0800 735 566 Sensitive Claims Helpline

(mō ngā pāpurenga koeretanga)

### Ara Poutama Aotearoa (Department of Corrections)

04 460 3000

[corrections.govt.nz](http://corrections.govt.nz)

### Te Poari Tukuhere (New Zealand Parole Board)

0800 PAROLE (727 653)

[paroleboard.govt.nz](http://paroleboard.govt.nz)

### Te tautoko whaiaro

Tirohia a [victimsinfo.govt.nz](http://victimsinfo.govt.nz), te wāhanga ratonga āwhina whaiaro rānei i roto i te puka waea.

### Ngā Pirihimana

Ka kitea e koe tō teihana pirihimana tūtata i [police.govt.nz](http://police.govt.nz), i roto rānei i ngā whārangi kikorangi i mua o te puka waea.

### Ngā kaitohutohu pāpurenga koeretanga me ngā kaitohutohu pāpurenga kōti

0800 650 654 Victims Information Line

### Manaaki Tangata

0800 VICTIM (842 846) 24 haora i te rā

[victimsupport.org.nz](http://victimsupport.org.nz)

### Women's Refuge

0800 REFUGE (733 843) 24 haora i te rā

[womensrefuge.org.nz](http://womensrefuge.org.nz)

### Ngā ratonga whakamāori a Language Line

0800 656 656

9am–6pm Mane-Paraire, 9am–2pm Rāhoroi

---

## Rārangi kupu

### Utu here

Ina tukuna he tangata kua whakapā hē e ngā pirihimana me te here i runga i a ia me haere ki te kōti.

### Whakapaenga

Te tangata ka whakatuakina ki te taihara.

### Te kōhurutanga

Ina kōhurutia he tangata e tētahi atu tangata.

### Tangata hara

Te tangata ka whakaharaina ki te taihara. (I mua i te whakaharaina ki te hara, e mōhiotia ana te tangata e whakapaehia ana mō te hara ko ia te 'whakapaenga'.)

### Te tukuhere

Ina tukuna tētahi tangata hara i te whare herehere ki te whakamutu i tana whiunga i roto i te hapori. Me mātua whai i ētahi here whāiti.

### Te ture whakahōrite

E taea ana ngā pāpurenga mā te ture whakahōrite te kōrero atu ki tētahi tangata hara mō te pānga o āna mahi, te whakauru whakaaro mō te whakataurite i te hara, me te tīmata ki te whakarite i ētahi o ngā pānga o te taihara. Ka karangahia he hui ture whakahōrite.

### Taihara nui

- He taihara koeretanga, tētahi patunga nui.
- He taihara ko te mutunga he wharanga kino, he mate rānei.
- He taihara e noho mātakutaku tonu ana te pāpurenga mōna anō, mō te ora rānei o tōna whānau.

### Kaitohutohu pāpurenga koeretanga

He kaimahi o te Tāhū o te Ture kua āta ākona, ā, he mōhiotia tonu ki te mahi i roto i ngā āhuatanga o te koeretanga. Ka taea e ia te whakamārama i te hātepe kōti me te whakamōhio haere i ngā pāpurenga kei te pēhea tā rātau kēhi.

### Te rēhita whakamōhio pāpurenga

He rārangi matatapu ka whakamahia e ngā tari ture taihara hei whakamōhio haere i ngā pāpurenga mō te tangata hara, pēnei nā, kei hea ake te kēhi i roto i te hātepe kōti, mēnā ka tukuna rangitahitia mai i te whare herehere, ā, āhea ka wātea mō te tukuhere.


Rēhitahia ō taipitopito ki te pirihimana whakahaere i te kēhi.

### Te tauākī pānga pāpurenga

He kōrero mō te pānga o te taihara ki a koe. I te nuinga o te wā ka tuhia te tauākī pānga pāpurenga, engari ka taea te whakauru whakaahua, tātuhinga, whiti rānei. Me mātua whakaaroarohia e te kaiwhakawā ina whakawhiu ia i te tangata hara. Ka taea e te pāpurenga te pānui i te tauākī ki te kōti i mua tonu i te whakawhiu.

## Te rūma kōti

E whakaatu ana tēnei hoahoa i tētahi tauira o te takotoranga o te rūma kōti, me ngā tāngata ka kite pea koe.



1. **Te kaiwhakawā** ko ia te rangatira o te kōti. Ka whakatau ia mēnā kei te hara te whakapaenga, ā, mēnā kei reira tētahi rōpū whakawā, ka riro mā te rōpū whakawā kē e whakatau.
2. **Te kairēhita o te kōti**, ka āwhina i te kaiwhakawā me te whakarite kei te whāia tikatia ngā hātepe o te kōti.
3. **Te rōpū whakawā**, he mea hanga ki te 12 tāngata māna te whakatau hē ki te whakapaenga.
4. **Te kaiwhiu**, māna e whakahaere te kēhi mō te Karauna, e whakatakoto te kēhi ki te whakapaenga.
5. **Te hunga pāpāho**, he kairīpoata e pūrongo ana i te kēhi.
6. **Te kaiwawao**, ka tū hei māngai mō te whakapaenga.
7. **Te whakapaenga**, te tangata ka whakaharaina ki te taihara.
8. **Te hunga tautiaki herehere**, ka tautiaki i te whakapaenga.
9. **Kaitohutohu pāpurenga koeretanga**, he āwhina i te kaiwhakaatu kia mārama ai ki te hātepe o te kōti. Kāore pea e noho i te kōti i ngā wā katoa.
10. **Kaitautoko a te kaiwhakaatu**, te tangata i whakaaehia e te kaiwhakawā hei tautoko i te kaiwhakaatu i roto i te kōti.
11. **Te kaiwhakaatu**, he tuku taunakitanga mō ngā mea i pā, ōna mōhio rānei mō te taihara.